

Pemuda halang anggota AADK jalankan tugas didenda RM10,000

SIBU: Mahkamah Majistret di sini, semalam mengenakan hukuman denda berjumlah RM10,000 atau penjara 10 bulan ke atas seorang pemuda yang menghalang anggota Agensi Anti Dadah Kebangsaan (AADK) menjalankan tugas serta melakukan khianat dengan merosakkan kenderaan AADK.

Majistret Oon Kork Chern terdahulu mengenakan hukuman denda RM3,000 atau penjara tiga bulan terhadap tertuduh, Wong Yew Chai, 27, atas pertuduhan menghalang anggota AADK menjalankan tugas.

Tertuduh dikenakan hukuman denda RM7,000 atau penjara tujuh bulan bagi pertuduhan khianat dengan merosakkan kenderaan pacuan em-

pat roda AADK sehingga menyebabkan kerugian sebanyak RM3,299.

Bagi pertuduhan ini, Wong didakwa mengikut Seksyen 186 serta Seksyen 427 Kanun Keseksaan.

Tertuduh yang dibenarkan bebas setelah membayar denda tersebut, didakwa melakukan kedua-dua kesalahan itu pada 11 Mac 2025, jam 2.55 petang di Jalan Hii Kah Tung.

Berdasarkan fakta kes, pengadu bersama tiga anggota AADK yang lain sedang menjalankan Ops Cegah dan cuba menahan seorang lelaki iaitu tertuduh yang memandu sebuah kereta kerana disyaki terlibat dalam penyalahgunaan dadah.

Apabila tertuduh menu-runkan cermin kereta, pengadu terlihat peralatan

yang digunakan bagi tujuan penagihan dadah di dalam kereta dan meminta tertuduh membuka pintu kereta.

Bagaimanapun tertuduh enggan memberi kerjasama dan bertindak mengundurkan keretanya yang kemudian merempuh kenderaan AADK serta sebuah kereta lain yang diparkirkan bersebelahan.

Satu laporan polis dibuat dan pada 12 Mac 2025, jam 10.50 pagi, pihak polis telah menahan tertuduh di Jalan Fong Ming untuk membantu siasatan serta merampas sebuah kereta Proton Saga serta kunci kereta.

Pendakwaan dikendalikan oleh Pegawai Pendakwa ASP Siti Mariyah Dahari, sementara tertuduh tidak diwakili.